

## 每週經課朗誦經文(巴克禮台語漢字)2012/11/25

### 共同經課 - 1

#### 撒母耳記下二十三章一節~七節

1 大衛結尾的話排列佇下底。耶西的子大衛講得著升高的人，是雅各的上帝所抹油的，佇以色列夯(Gâu)做歌者的講：2 耶和華的神用我來講：伊的話佇我的舌。3 以色列的上帝有講，以色列的石磬對我講：用公義治理人，敬畏上帝來治理的，4 伊欲親像透早日抵仔出的光，無雲的清早，雨落過身的光彩，互地發幼幼的草。5 我的家佇上帝的面前唔是按呢；猶久伊有及我立永遠的約。無唔照次序排列閣堅固，雖然伊無互伊生長，這就是我一切的拯救，一切的意願。6 總是匪類攏親像荊仔欲受割揀：人唔敢用手提伊；7 欲摸伊的人著用鐵器及槍柄，佇伊的所在欲互火一盡燒去。

### 共同經課 - 2

#### 詩篇一百三十二篇一節~十二節

1 〔上崎仔的詩。〕耶和華啊，大衛所受一切的苦難求你記念伊！2 伊怎樣對耶和華咒誓，對雅各的大權能者下願，3 講：我的確無入我的家的布棚，也無上我的眠床；4 我無容允我的目矚困去，也無容允我的目矚皮合倚；5 聽候我為著耶和華尋著所在，為雅各的大權能者尋著倚起的所在。6 看啊，阮聽見約櫃佇以法他，阮佇樹林的田抵著伊。7 阮欲入伊倚起的所在，阮欲拜佇伊的腳踏椅前。8 耶和華啊，求你起來，你及你的氣力的約櫃相及入你歇暈的所在！9 願你的祭司穿公義做衫！願你聖的百姓出歡喜的聲！10 求你因為你的奴僕大衛的緣故，莫得棄揀你的受抹油者！11 耶和華用誠實對大衛咒誓，的確無反覆，講：我欲互你所生的坐佇你的寶座。12 你的子若守我的約及我所欲教示in的法度，in的子孫欲永遠坐佇你的寶座。

### 共同經課 - 3

#### 啟示錄一章四 b 節~八節

4 願恁得著恩典、平安！對彼個現在佇啲、早佇啲、將來亦佇啲的，以及對伊座位前七個神，5 閣對耶穌基督就是忠信的干證、死人中頭一個活的、地上諸個王的主宰。伊疼咱，用伊的血解放咱脫離咱的罪，6 互咱做國，做伊的父上帝的祭司。願榮光、權能歸佇伊，到代代。阿們！7 伊坐雲來！眾目矚欲看見伊，連鑿伊的人亦欲看見伊；地上的族攏欲為著伊來啼哭。實在是按呢。阿們！8 主上帝講：「我是阿利法，閣是奧美加，現在佇啲、早佇啲、將來佇啲的，是全能者。」

### 共同經課 - 4

#### 約翰福音十八章三十三節~三十七節

33 彼拉多閣入公堂，召耶穌來給伊講：「你是猶太人的王嗎？」34 耶穌應講：「你講此個話是對你家己，抑是別人將我的事給你講啊？」35 彼拉多應講：「我豈是猶太人嗎？你本國的人及諸個祭司頭將你交互我。你果然怎樣做啊？」36 耶穌應講：「我的國唔是屬此世間；我的國若屬此世間，就我的差用的確爭戰，免得我交互猶太人。若是今我的國唔是對遮出。」37 彼拉多就給伊講：「按呢，恁是王嗎？」耶穌應講：「你講我是王。我為著按呢出世，為著按呢臨到世間，欲替真理做干證。凡若屬真理的人聽我的聲」。